

21 NOV 2000

LID-Gulung (Malam)

PERWAKILAN LID 2000 BANGGA DAPAT BERSETUJU DALAM BANYAK ISU

Oleh: Yong Soo Heong

LANGKAWI, 21 Nov (Bernama) -- Para perwakilan yang menamatkan perbincangan mereka di Dialog Antarabangsa Langkawi 2000 (LID) di sini, hari ini, boleh berbangga yang mereka telah bersetuju terhadap beberapa isu utama di bawah falsafah perkongsian pintar.

Yang paling utama antara ini ialah isu-isu berhubung bagaimana menangani globalisasi dan kesannya terhadap penduduk di ekonomi-ekonomi sedang muncul.

Di bawah semangat "Malaysia Boleh", beberapa penceramah Malaysia menunjukkan satu jalan keluar -- ekonomi-ekonomi sedang muncul harus cuba menetapkan sendiri kadar globalisasi supaya ia selaras dengan keupayaan negara itu.

Ini dinyatakan dengan jelas oleh Gabenor Bank Negara Malaysia Datuk Dr Zeti Akhtar Aziz yang berkata ekonomi-ekonomi perlu mempunyai mekanisme untuk mewujudkan kesedaran dan persefahaman akan perubahan yang boleh dibawa oleh globalisasi.

Oleh sebab itu, mereka perlu meningkatkan tahap persediaan mereka. Ini bermakna menerima pakai strategi yang betul dan meningkatkan keupayaan daripada segi pembangunan institusi dan mewujudkan rangka kerja perundangan dan kawal selia yang sesuai.

Untuk berada dalam kedudukan lebih baik, ditekankan yang pendidikan merupakan kunci dalam menguasai teknik dan teknologi yang berkaitan dengan proses globalisasi.

Pendidikan juga boleh membawa penguasaan yang lebih baik bagi kanak-kanak dan golongan muda yang akan menjadi sumber manusia dinamik dan pemimpin masa depan.

Pendidikan juga membantu mewujudkan kesedaran terhadap potensi penyakit dan bagaimana mengelakannya supaya mereka boleh membesar dan menjadi orang dewasa yang berupaya untuk menyumbangkan kepada kesejahteraan ekonomi negara.

Satu pemerhatian menarik ialah ekonomi-ekonomi sedang muncul semakin bersetuju akan perlu bersuara bersama-sama di forum-forum antarabangsa, satu bukti akan sokongan yang terus meningkat bagi cadangan Perdana Menteri Datuk Seri Dr Mahathir Mohamad supaya mereka memastikan yang mereka tidak diketepikan oleh kuasa pasaran yang menekan.

Untuk dapat berbuat ini, dicadangkan perlu ada lebih banyak dialog dan perangkaian di kalangan pemimpin pergerakan perkongsian bestari.

Seperti yang dibuat oleh Dr Mahathir di dialog LID untuk menarik perhatian terhadap ketidak seimbangan yang dihadapi oleh ekonomi-ekonomi, para perwakilan LID boleh berbangga yang mereka menemui kunci ke arah ganjaran yang lebih bijak dengan menyuarakan melalui satu suara. Suara itu boleh menjadi lantang hari demi hari dengan lebih banyak ekonomi sedang muncul bersatu melalui perkongsian bestari.

-- BERNAMA

SHY PR